

Chhuah ãan: Oct., 1984

AUGUST, 2017

# RAMTHAR



**MALSURY KOHHRAN BIAK IN**  
**HOME MISSION SOUTH**

**SERMON**

HARHNA...phêk 3 - 6

RAMTHAR ASSOCIATION CHANCHIN BU THLA KIP CHHUAK

**EDITORIAL BOARD 2016 - 2018**

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pi C. Lalrampári	9436190803 (M)
News Editor	: T Upa Lalbiakênga Fanai	9436366234 (M)
Cir. Manager	: Pu Lallawmnaikima Hmar	8575178109 (M)
Publisher	: Rev. K. Lalrinmawia	9485140409 (M)

**[Office hun chhúngin biak ni thei se]****Member-te**

Rev. Lalzulthanga	: Synod Moderator
Rev. Lianhmingthanga Sallo	: Synod Secretary (Sr.)
Rev. B. Sangthanga	: Executive Secy., i/c Mission
Rev. Lalremruata Ralte	: BEC Member
Upa H. Thangmawizuala	: BEC Member

Thu chhuah tûr nei chuan Email - ramtharchanchinbu@gmail.com-ah emaw lehlam chauhvah ziakin Editor emaw Cir. Manager, Ramthar Chanchin bu, Synod Office, Aizawl, Mizoram (India) hnênah emaw thawn tûr a ni e.

Ramthar Chanchinbua thu chhuah hi a ziaktu mawhphurhna a ni.

**SYNOD MISSION BOARD HOTUTE:**

<b>Rev. B. Sangthanga</b>	<b>Executive Secretary</b>	9862374232
<b>Rev. K. Lalrinmawia</b>	<b>Secretary</b>	9485140409
<b>Dr. Robert S. Halliday</b>	<b>Coordinator</b>	9436372139

**KUM KHAT LÂK MAN - ₹ 60/-****A CHHÛNGA THU AWMTE**

- |                                      |         |
|--------------------------------------|---------|
| 1. Editor thukhawchâng               | - 1     |
| 2. Keimahni                          | - 2-3   |
| 3. Sermon                            | - 4-6   |
| 4. BUHHMUN AṬANGIN:                  | - 7-19  |
| (1) Jail táng chhuak an hnawt chhuak |         |
| (2) Tihdamna                         |         |
| (3) Aizawl West - II Area Meet       |         |
| (4) Jolay hmunah Lalpa nêh           |         |
| 5. Kohhran Inchhiarna (Statistics)   | - 20-22 |
| 6. Ramthar Feh                       | - 23-30 |
| 7. Pi P.C. Billy Rongpi kan chán tal | - 31-32 |

## LĂWM CHUNGA LALPA RAWNGBĂWL

### EDITORIAL

Thuthlung Hlui huna zawlneite khân rawngbâwl tùra Pathian kohna chiang takin an hria: “LALPA *chuan heti hian a ti*”, “LALPA *thu chu ka hnênah a lo thleng a*” tiin. Zawlnei Amosa chuan, “Sakaibaknei a rûm a, tuin nge hlau lo vang?” LALPA *Pathianin thu a sawi a, tuin nge hril lo thei ang?*” a ti a. Jona khân Pathian kohna hre chiang hle mah se, hêlna a zawng a zawng a; mahse, a tâwpah chuan ani pawhin a hril tho. Rev. Dr. Zairema khân, “Isaia *chu Pathianin hlawhchham tùrin a ko,*” a ti. LALPA rawngbâwl ve si, hlawhchham si chu lâwm a har âwm. Joshua chuan an chhúngkuuaa LALPA rawngbâwl a thlang. A tifuh.

Pathian rawngbâwl tùr hian kohna kan hriat dân a inang vek lo vang. A pawimawh chu kohna kan hriat dân a chian leh chian loh aiin kohna kan tihhlawhtlin leh hlawhtlin lohvah a innghat, Kohna rî a rin leh rin loh aiin kohna tihhlawhtling tùra kan inpêkna te, kan tih tak zetna te, min kotu leh kan rawngbâwlsak te kan hmangaih leh hmangaih lohvah te a innghat.

Pathian rawngbâwl tùra kan inhuam dân hian kan rawngbâwlnaah kawngro a su thei hle. Kan huphurh aia a lo nawm viau avàng te, hotu hmêlhriat kan neih that avàng te, promotion a chak avàng te, thian leh hmêlhriatte nèn kan thawh ho avàng te, kan rin aia kan hlawh a tam avàng te, kan post a fuh avang te mai a nih chuan a fel tâwk lo vang. Kan lâwmna chhan tùr chu LALPA dân ni ngei rawh se. Rawng kan bawl naa theih tâwp kan chhuah avàng te, an thawhrim avànga kan rawngbâwlsakten malsâwmna an dawn lêt avàng te, Krista avànga harsatna leh tawrhna kan chung a thlen avàng te, chhelna, dawhtheihna leh hmangaihna nêna LALPA rawng kan bawl tlat avànga lâwm tùr kan ni. Lâwm lova LALPA rawngbâwl chu rawngbâwltu leh a rawngbâwlsakten an tuar.

Lal Isuam, “Dâwta *sual tinrênga an hêk hunah che u in eng a la thâwl ang,*” a ti. Krista avànga sawi chhiatna te, hek te, hmuhsit te, tihduhdah tuar te chu a lâwmna chhan tùr a ni. Mi an inthlahdaha, Krista leh a Kohhran leh a rawngbâwl hna an sawi chhiat hun pawhin, ‘Lâwm chungin LALPA *rawngbâwl ula*’ (Sâm 100:2) tih hi vawng tlat ila, a rah lawh hun a lo la thleng ang a, chu chu kan lallukhum a la ni ang.

**K E I M A H N I****† TUARPUINA:**

**1) Pu T. Lalramthanga (42)**, Pi C. Sianglunmawii, Evangelist Teacher, Tuidu (Tripura Mission Field) pasal chuan ni 8 June, 2017 khán *pneumonia* avàngin chatuan ram min pansan.

**2) Pi P. C. Brilly Rongpi (58)**, Office Assistant (Karbi Anglong Field) chuan stroke avàngin ni 12 June, 2017 khán chatuan ram min pansan (*A chanchin phêk 31-32-ah*).

**3) Pi Biakthunami (89)**, Thingsul Tlangnuam, Rev. TC Laltlanzova, BEC member nu chuan ni 17 June, 2017 khán Zunthlum avàngin chatuan ram min pansan bawk.

**4) Pu J.H. Tlanliana (62)**, Bethlehem Veng, Pi J.H. Zoramthari, Evangelist Teacher, Damparengpui (HMN) pa chuan Cancer avàngin ni 24.06.2017 khán chatuan ram min pansan.

**5) Upa Thanzuala (96)**, Phullen, Pi P.C. Lalremsangi, Evangelist Teacher, Cachar Kahrawt (Barak Area) pa chuan ni 29.06.2017 khán awmlaiin chatuan ram min pansan.

**6) Upa H. Thantluanga (67)**, Biате, Rev. H. Lalmuanpuia i/c Noagang Pastor Bial (Tripura Mission Field) pa chuan ni 29 June, 2017 vêk khán stoke avàngin chatuan ram min pansan bawk.

Synod Mission Board-in lusun chhúngte a tuarpui tak zet a ni. Pathianin thlamuanin awmpui theuh rawh se.

**† RAMTHAR CAMPAIGNER-TE PUALIN TRAINING:** Synod Mission Board-in Ramthar Campaign neih a rawtna chu Synod Executive Committee-in a remtihsak a. SMB chuan Presbytery hrang hranga Ramthar Campaign-a kal chhuak tūrte pualin ni 9 June, 2017 khán JM Lloyd Hall, Synod Office-ah inrawn khāwmna (Training) a buatsaih. Rev. Lalchhuanmawia leh Rev B. Sangthanga te paper zir ho niin, sawi hona hun tha tak hman a ni.

**† NEPAL KRISTIAN HLA BU:** Nepali Kristian Hla bu chu peih fel a ni a, a man ₹ 50/- a ni. Masihi Sangati Kendra, Bawngkawnah leh SMB Pisapuiah te lei theih a ni. *Devangiri Script* copy 500 leh *Roman Script* copy 1,000 chhut a ni.

**SYNOD MISSION BOARD HNUAI A MISSION SCHOOL HSLC EXAM RESULT, 2017**

Sl. No.	Name of Schools	FIELD	No. of Apprd	Dstn.	Star	Div.			Total Cpmntl P	No. of F	No. of Let.	Passed p.c.	
						I	II	III					
1	Salem Boarding H/S	H/M 'N'	16	Nil	Nil	3	1	8	12	1	3	75.00%	
2	SHMS Bungtlang 'S'	H/M 'S'	9	Nil	Nil	1	5	2	8	1	Nil	88.88%	
3	SHMS Tlabung Zodin	H/M 'S'	6	Nil	Nil	Nil	5	1	6	Nil	Nil	100.00%	
4	OHS Silchar	Barak	41	3	6	33	7		40		1	93	98.00%
5	RMHS Karimganj	Barak	52	6	22	48	4		52			147	100.00%
6	Winchester H/S	Barak	24			5	10	5	20		4		83.33%
7	PMHS Diphu	Karbi	25		1	11	12		23		2	11	92.00%
8	PMS Hamren	Karbi	27			4	15		19		8	7	70.37%
9	PMS Koilam ati	Karbi	10			2	7		9		1	2	90.00%
10	JES Lakla	Aru. 'E'	32		2	14	16		30		2	21	93.75%
11	TMS Khasan	Aru. 'E'	17		1	12	1		13	4		9	76.47%
12	St.Paul H/S Bairabkunda	Assam	12			2	2		4		8		33.33%
13	JMHS Jonai	Aru. 'N'	14	1	2	11	3		14			5	100.00%
14	St.Peter H/S.Madhuripa thar	Ar. 'W'	23		3	12	10		22		1	11	95.65%
15	CHS Tuidu	Tripura	31				18	12	30		1		96.77%
16	BES Noagang	Tripura	31			4	17	9			1		96.77%
	<b>TOTAL</b>		<b>370</b>	<b>10</b>	<b>37</b>	<b>162</b>	<b>133</b>	<b>37</b>	<b>302</b>	<b>6</b>	<b>32</b>	<b>309</b>	<b>86.89%</b>

Note: 1) Oriental H/S Silchar hian Mizo leh Manipuri-ah Subject topper an nei  
 2) Distinctin leh Star mark hmute hi First Div.-ah chhhar an ni.



(H. VANLALCHHUANGA)  
 Supervisor of Schools  
 SMB



## SERMON HARHNA

*Chhiar tūr: 1 Johana 4:1; 3 John 2*

*Dr. Robert S. Halliday  
Coordinator, SMB*

Khawvelah thil pakhat a awm a; chu thil chu i neih hnuah mi dang i pêk chhawn hnu pawhin i la kawl reng a, i la hlimpui zâwk zêl bawk a, mi dang îla duh sak cheu bawk. Chu thil chu Chanchin Ṭha a ni. Mizoram hi Chanchin Ṭha-ina a zawn chhuah ram a ni a; kan vanneihna chu Harhnain min tuam reng hi a ni.

**Harhna - Bible-ah:** Sâm 85-naah chuan Harhna chu a mite AMAHa an hlim theih nâna pêk kan nih mai bâkah Lalpa ropuina an ramah a awm theih nân a ni tih kan hmu. Thuthlung Thar lam kan en chuan Harhna chu mahni inphata, mi dang te tâna inpêkna a ni. Tûnlaiin kan ramah Harhna chu a lo thleng mék a, thlarau khawihna chu kan chang mék a ni. Mahse, ‘*Thlarau hruaiin kan awm em?*’ tih erawh chu kan inzawh a ngai.

Harhna a lo thlen hian kohhranho hian Pathian ropuina atân nasa taka ṭan kan lâk a ngai. Chuti a nih

loh chuan hlimnaah hian kan tàwp mai ang tih a hlauhawm hle a ni. Johana 16:13-ah chuan- “*Thlarau dik tak a lo thlen hunah chuan thutak zawng zawngah a hruai lût ang che u,*” tih kan hmu. Vawiinah hian kan ram hi thutakah hruai luh kan awm mék em?

**Harhna rualin harsatna a thleng ṭhin:** Harhna a lo thlenin Kohhran a nun phah a, khawtlang nun a nuam a, kawng tam takah hmasâwnna a thleng ṭhin.

Chutih rualin, Harhna a lo thlenin Kohhranah harsatna a thlen phah ve fo bawk. Chuvàngin ṭan

kan lâk a ngai hle. Hêng harsatnate hi a lo thleng fo ðhin:

1) *Kohhran duh khawp lohna.*

2) *Kohhran ngaihnêpna.*

3) *Kohhran hnawk tihna leh chhuahsana mahni duh zâwnga Pathian thu her remna.*

4) *Harhna changtute keh thei dawma dawm an ngai.*

5) *Harhna changtute tlawn ngai – an titau ang tih hlau rêng rênga anmahni tui zâwng tihpui ngai tlata hriatna.*

Kohhran chanchin kan chhui chian chuan thlarau chang zâwkte, mi dang fuihtu leh kohhran tichaktu tûra ngaih, kohhran chhuahsan daih lawi te an awm fo. Tlira pâwl lo te leh a hnu zêla mi te pawh Harhna thlengin a nghawng chhuah eng emaw zât an awm a ni.

**Harhna hi fimkhur taka kalpui a ðûl:** Harhna

a lo thlenin Kohhranhote hian ‘Pathian a langsâr em?’ tih hi kan inzawh fiah a ðûl hle. Pathian aia langsâr zâwk leh tuiptui zâwk neih theih tak a ni. Mihring emaw, tih dânphung emaw, a langsâr zâwk thei a ni. Lal Isua chawimawia a awm hian Harhna dik a ni ðhin.

Bible-ah - “*I thlarau chuan malsâwmna a hmuh angin, engkimah malsâwmna i hmuh leh i dam theih nân kan ðawngðai ðhin a ni,*” tih thu kan hmu (3 Johana 2). Lalpa hian kan nun pum pui min khawiha, minrawn tihharh a duh a ni. ‘Dam theih nân’ tih hi ðawng bul lamah chuan ‘*zin kawng nuam*’ tihna emaw ‘*kal kawng ðhaa hruai a awm*’ tihna emaw a ni a.

Pathian hian ringtute hi nuam ti taka Pathian thutak leh a duh zâwng anga kan kal theih nân Harhna hi min pe ðhin a ni. Mi tam tak chuan kan thlarau leh tisa hi ðhen hran kan tum ðhin a; mahse, Pathian erawh chuan tisa Pathian

awmpuina, ÷anpuina leh malsàwmna hian kan thlarau nun hi a chawm zàwk ÷hin a ni.

Hemi avàng hian Harhna changtute chu -

1. *Pathian duh zàwng*

2. *Thlarau Thianghlim hruaina*

3. *Pathian Thua tuihàlna*

4. *Lalpa pàwl duhna*

5. *A ram leh a felna dah pawimawhnaah an lùt ÷hin.*

Sam 84-ah chuan Pathian hian dik taka kan awm chuan eng mah kan tâna a ui loh tùr thu kan hmu a. Lalpa hnên a÷anga malsàwma dawng tùr chuan keini lam hian kan thlarau dawn leh chan mék lai hian, Johana chuan, “*Thlarau nazawng ring suh ang u; amah-erawhchu, thlaraute chu Pathian laka mi an ni nge ni lo fiah rawh u,*” min ti a ni (1 Joh 4:1).

Pathian laka mi - thlarau chuan

1. *A changtute chu hahchawlhnaah a hruai ÷hin.*

2. *A changtute chu Pathian fa kan nihzia min hriattír a, thianghlimna kawngah min hruai lùt ÷hin.*

3. *Rah a chhuah ÷hin (Gal 5:22).*

4. *A changtute thinlung thlāk thlengsakin, tisa anga ném thinlung a pe a. Thlarau thar pein, Pathian dân siamah a lentír a, a thupêkte vawng thei tùr leh zawm tùrin a a buatsaih ÷hin a ni (Ezekiela 36:26).*

**Tláng kawmna:** Mizorama Harhna paw chhuak hmasatute khân anmahni lam inen lovin Pathian an mamawhnaah an tlu lùt a, chu chuan rah ÷ha a chhuah a ni. Harhna hi fimkhur taka kalpui a ngai. Kan ramah Pathian a lo ropui ber theih nán Lalpaah i tlu lùt thar leh ang u.

Mission Field hrang hranga mamawh tàr lanna (SMB PROJECT LIST 2017) hi Synod Office-ah a lam theih reng e.



## **BUHHMUN AṬANGIN JAIL TÁNG CHHUAḲ AN̄ HNAWT CHHUAḲ**

*Rev. R. Vanlalngena  
i/c Guwahati Ramthar Bial*

Sapangaon-a kan Kraws Sipai, Raphael Murmu chu hmanni lawk khán Jail-aṭangin a lo chhuak a. Tûnah hian an khua aṭanga chhuak tûrin khaw hotu (*Gaon Bura*)-in thu a pe leh ta tlat mai!

**Jail-a a luh dân:** Kum 2011 khán Guwahati Ramthar Pastor Bial, Sapangaon-a véng pakhat Paharpur-ah zu rui pahnih an intibuai a. A ṭhelh tûrin Raphael-a hi an pun a. Intibuai zinga mi pakhat zâwk chu a hnu rei vak lovah a thi ta mai a. Mitthi chhúngte chuan thubuai (FIR) an theh lût a. Chutah chuan a ṭhelhtu Raphael-a hming pawh hi an ziak tel ve a ni àwm e (*Postmortem result-ah chuan tûr (poison) hnathawh vânga thi anga târ lan a nî*). A insualpui Som Baski-a leh a ṭhelhtu chu police lam chuan an ko ta a. Hêng lai vêla mite hi namén lova *police* hlau chi an lo ni bawk nèn, ṭum eng emaw zât koh hnuah pawh inlan ta mai lo chuan an tlanche zak zak a.

Kum 2016-ah khán Paharpur-ah hian mitthi an nei leh a. A khaw mite chuan remcháng lo chung chungin kan Kraws sipai chu an mawhchhiat ta tlat mai a (*Amah hi Kristian leh rawngbâwltu a nih vângin ringlo mi ṭhenkhatin an haw hrim hrim a*). Nasa taka sawi chhiain police mantír an tum hial a. Kohna lehkha a dawng leh ta a.

He lehkhaah hian an koh chhan erawh ziah lan a ni lo. Raphael-a chuan, '*Engtia tih chi nge ni ang?*' tiin Sapangaon-a kan missionary chu a ráwn a. Ani chuan, '*Tûn ṭihna chungchânga kan insawi fiahna te, mi hnawksak kan nih lohzia te, mite rawng-bâwlsaktu kan nih zâwkzia te sawi fiahna remcháng a ni ang chu,*' tiin

*police station*-ah chuan a va hruai ta a. Police lam chuan kum 2011-a thil thleng chu chhuanlama hmangin ni 18 June, 2016 khán an lo man ta daih mai a! A hnu eng emaw chenah Som Baski-a pawh an man ve leh bawk.

**Chhantu nei lovin, Jail-ah:** Udalguri District Jail, mi 350 vel tân theihnaah chuan an khung ta a. An khua leh khaw thenawmah chuan chhúngkhat laina awm thei ve tak takte pawh an nei nual a; mahse, Raphael-a Jail táng hi tu man an ngaihsak lo va. A chhuah theihna tura buaipui chu sawi loh, tlawh pawh an tlawh ngai lo. Som Baski-a dinhmun pawh chutiang tho chu a ni.

Sapangaon-a kan missionary-ten theih tâwp chhuahin an buaipui a. Assam Mission Field tân pawh ñawngtai thupui a ni chho ta ngar ngar bawk. Kumin 2017 kum tir lam a ñang khán Raphael-a buaipui hna hi a ram mi (*local evangelist*) Pi Ripa Muchahari (*a pasal chu Pro Pastor Somlal Soren (L), damlohna avànga nem*

*ngheh theih tâk loh kha*) chuan Sapangaon kohhranin mawhphurhna a pêk angin a kutken ta chawt a. An puih theihna ang angah pawh a chhúngte hian an pui duh miah lo nia!

**Isua nèn Jail rún a nghak:** Tân Ina a tân tirh ni thum chhúng chu a rilru a buaiin a mangang êm êm a; mutmu a tuah lo va, chaw pawh a ei ña thei lo. Mahse, ñingthiin Pathian a au ta ngat ngat mai a. A tânpuite chuan mak an ti thei hle. Ni khat chu, "*Lalpa, i thu chhiar tûr ka mawmawh a, min pe rawh,*" tia a ñawngtai zo chiah hi a ñianten tlawhtu a neih thu an rawn hrilh a. Pu Ronghinglova K, Evangelist leh Pi Ripa-i te chuan an Bible kensak chu an pe ta a, amah pawhin mak a ti khawp mai.

A Bible keu hmasak bera thu lo awm, Isaia 41:10-13, "*Hlau suh u, kei in hnênah ka awm si a; mangang suh u, kei in Pathian ka ni si a...*" tih chuan a hlauhna leh zahna zawng zawng chu tihbo-sakin, chakna thar a lo nei ta a ni.

**Jail chhúng rawng-bàwlna:** A rawngbàwlpui, amah va tlawh thintu, Field Secretary, Bialtu Pastor, Sapangaon leh Bhairabkund-a thawktute pawhin a Jail tàn chu ‘*Chanchin Tha hrilna remcháng a ni ang*’, tiin an fuih ve sauh sauh thín a. Chu chu an tawngtai hla ber pawh a ni thín. Tawngtaina chhángtu Pathian a rawn che ta a.

Ni tin zing leh tlai dár 6:00-ah Bible chhiarin Pathian thu a sawi ta thín a. A tânpuí Kristiante chuan, “*Tu nge maw i nih le? I hlau lo em ni?*” tiin, mak ti takin an zâwt a. Ani chuan, “*Pathianin min awmpui a, hlauh tûr eng mah ka hre lo. Ka âw leh ká te hi Pathianin a hmang dawn a ni,*” tiin, a chhángmai thín. Pathian thu hre châk, mi thenkhat chuan ni tin a bulah kal khâwmin, “*Pathian thu sawi leh tawh rawh, kan ngaithla châk,*” tiin, an ngen fo thín a. A ke vuana tawngtaisak ngen ta tlatte pawh a tawng nual mai. A rawngbàwlna avànga Kritianna hmelhriat leh kristian nih duh hialte pawh mi eng emaw zât an awm. A

tânpuí chhuak ta hmun hrang hranga mite pawhin anmahni tlawh chhuaka, Pathian thu hrilh tûrin an ngen sup sup bawk.

Pathian thu a sawi bâkah hian a tânpuíte chu hla pakhat, “*Ei jibonor hipare, Aaru ek jibon ase*” (*Hringnun hi a ral hunin, nunna pakhat a la awm*) tih hla a zirtír a. He hla hian mi tángte thinlung a hneh thei hle a. Jail lam hotuten an tlawh apiangin he hla hi an lo rem thín. Raphael-a hnênah hian Bible leh tract te pawh pe lûtin Jail-ah hian thahnem tak sem ral a ni bawk.

Jail-aţanga a chhuah dawn pawhin a tânpuíten an ui êm êm a. Lâwmpui chung siin an hnêna la awm zui zêl atán an ít ngawih ngawih a. “*Min rawn tawngtaisak thín ang che*”, tih leh “*Ka chhúngte lo tlawh la, Isua chanchin lo hrilh ve ang che*”, tih chu an thuchah rawn lâr tak a ni. A tàn chhúng hian a thiante tán Thuthlung Thar a chhiar chhuahsak hman a ni.

**Khua ata an hnawt chhuak:** Ni 18 June, 2016-

ah man niin ni 17 May, 2017-ah a lo chhuak a. Gerasin miten ramhuai pai lo dam ta an lâwmpuina aia an vawk an uina a lian zâwk ang deuh khân Raphael-a tâng chhuak chuan lâwm a hlawh lo hle. Rinna leh rawngbâwlnaah hma a sâwn nasa hle tih an lo hriat avângin an véngte chuan an lo ep nasa mai a. An *Gaon Bura* pawhin, “*I sual vângin Jail-ah i tâng a, i nupui fanaute pawhin an tuar nasa lutuk,*” tiin, hmusit takin a lo khak a. Ani chuan, “*Ka nupui fanaute hian an tuar awzáwng lo. Jail-a min rawn tlawh pawhin hlim takin kan inchibai thin a, In lamah pawh harsatna eng mah an lo tâwk lo. Pathianin a awmpui a, ka tàn hma aiin an hrisèlna pawh a tha zâwk,*” tiin, huaisen takin a chháng hmiah mai a ni.

A tànpuai, Som Baski-a hi ringtu la ni lo, khawtlang pawhin mi suala an ngaih, mi thenkhat phei chuan an tih êm êm mai hi a ni a. Mahse, Raphael-a hian an tannaah thahnem ngai taka Pathian thu hrilhin a tawngtaisak thin a. Pi Ripai hian an pahniha an chhuah

theihna tùrin a buaipui char char bawk a. Chu thil pahnih tâng kawp chuan Som Baski-a rilru a hneh hle mai a, Kristianna lam a àwn tan ve ta a. A chhuah hnu hian tum khat chiah inkhâwm a la thulh a ni.

Véng mipuite chuan an véng pa sual nia an sawi thinin Kristianna a àwn ta tlat mai chu mak tiin an ngaithei lo hle a. A bulpui, Raphael-a lamah bawk an tuan leh ta a. An khaw hotu (*Gaon Bura*) hnênah hêkin, “*Kan khua a chawh buai zo vek...Khaw mi zawng zawng kristianah a siam mai dawn, hnawt chhuak rawh,*” ti tein an bei nasa hle a. An *Gaon Bura* chuan a khua leh tuite hêkna chu zàwmin Raphael-a chu a chenpui, a nu leh a nupui fanau te nèn an khuaa chêng tawh lo tùrin thu a pe ta a. Awmna tùr zawnna hun pein tûnah tak hi chuan an la chhuahtír rum rum rih lo. Eng tikah nge an chhuahtír ang tih ngaihchan mék a ni.

Raphael-a te chhúngkaw tán te, a rawngbâwlna kal zél atána lo tawngtai tùrin tih tak zetin kan sáwm a che u.



## TIHDAMNA

*Rev. Lalawmpuia, Dibrugarh*

Dibrugarh Fellowship hi Pastor thuthmun niin, tûnah hian member 50 kan awm. Kan member-te hi ei zawna kawngah hna lian tak thawka ‘officer’ kan tih ang hi an awm hran lo va; harsa ve tak tak, khawi maw lai *company* leh mi mal hnuaia thawk an ni hlawm. Chuti chung chung chuan, Pathianni inkhâwm hi Pathian khawngaihna kan chhe ngai vak lo a ni ber mai. Hnam hrang hrang awm khâwm Mizovin ‘Vai’ kan han tih ang hi chu kan kim a ni ber mai.

Tûnah hian Evangelist pahnih – Pu K. Vanlalhriata te chhúngkua leh NI PC. Lallawmzuali te an awm a; anni bâkah hian Pu John Sharma (Field Woker)-te chhúngkua an awm bawk. Kumin chhúng hian Lalpan ringthar paruk (*puitling 4 leh naupang 2*) min pe a, kan lâwm hle. Kohhran dang aţangin puitling parukin min rawn zawm bawk.

Dibrugarh Fellowship-a Pathian hnathawh lo lang chu - ringtharte hian eng lai mahin Pathian faka zai hi an kham ngai lo va, zai tui loh leh zai dul a awm ngai lo hi a ni. Pathianni bâkah Nilaini tlaiah Kohhran inkhâwm kan nei thîn.

Kan Fellowship-in kan tih thîn dân pangngaiin ni 21 May, 2017 (Pathianni) inkhâwm chu ‘DAMNA INKHÂWM’ a ni. Thla khata Pathianni vawi thumna hi ‘Damna Inkhâwm’-ah kan hman thîn a, thuhrlitu apiangin DAMNA lam thuchah (sermon) kan sawi thîn.

Hemi ni hi thuhrlitu tûr ka ni a, phâk ang tâwkin ka inbuatsaih ve a. Kan Fellowship hian ‘Damna Inkhâwm’ ni hma chiah (Inrinni) hian a tûk, Pathiannia ‘Damna Inkhâwm’ pualin ţawngţai hona kan hman thîn bawk. He damna inkhâwm hi an nghâkhlel hle thîn.

He mi tum hian thupuih “*Isua zuitu nih man*” (Luka 14:25-33) hmangin thu ka sawi a. Tum dang ai mahin Pathian malsawmna leh awmpuina ka dawng nasa zual em em a, thusawi pawh a zangkhain a nuam ka ti hle a ni. Tichuan, thusawi tapah kan tih dan pangngaiin Committee Member chin kan indintir leh a; dam lo rawn kal apiangte an natna khawih theih chi chu lo khawih turin kan inti leh a, kan tanngtai rual zui nghal a.

Inkhawm ban chuan ring lo pitar rawn inkhawm ve satliah, ruh lama harsatna nei, doctor-a beidawng tawh chuan a dam vek thu puangin Kristian nih ve a duh thu a sawi ta mai a! Kan lawm tawh tehluul nen, ka nupuiin damna a chang ve tih kan hriat phei chuan kan hlimna em em a ni.

Ka nupui (C. Lalrammuani) hian kan inneih hma atang tawhin a taksaah hian duk a nei thluah mai a. Vawi tam an

*in-check up* tawh a, awmzia a awm thei lo. Kan inneih hnu-ah pawh a taksa duk thluah ringawt mai avang chuan ka ngaih hi a tha thei lo thin a. Hei mai hi a la ni lo, a ke hnuai te leh a kut te a ‘nghamit’ nasa hle. Hei pawh hi kan inneih hma atanga a lo neih tawh a ni.

A nasat tak taka, a na a chhuah phei chuan a rap tha ngam lo va; a inbual zawh phei chuan a lo pawrh a, a mawi lovin, hrehawm a ti thei hle a. A kuta mi phei chu mi dang chibai pawh nuam lo ti khawpin a lo awm tawh a. Doctor tha, helam thiam an awm tih an sawi atangin pan ve kan tum lai mek a ni. Mahse, Lalpa thiltihtheihna a lo lang ta, a va ropui em! Nghamit emaw, taksa duk thliah thluah emaw hmuh tur reng reng, eng mah a awm ta lo! Lalpa chu fakin awm rawh se!

*‘Mi hnênah ka sawi anga, a lo reh Chiang si lo palh ang e,’* tiin a taksa chu kan han ennawn leh thin. Taksa duk leh nghamit nasa tak a nei thin tih reng

a hriat loh, a va han dam  
chiang êm!

chuan bâng lovin chakna  
i dil tlat ang u.

Ka sawi duh tak chu  
hei hi a ni - “KRISTIAN-  
TE PATHIAN HI A RIN TLÂK  
A, A MITE ṬAWNGṬAINA  
LEH MANGANG AU  
THÂWM HI A NGAITHLA  
RENG” tih hi a ni. ‘Engkim  
a hun têah’ tih leh ‘ama  
duh angin’ tih erawh chu  
hre reng ila; kan beisei  
hunah kan beisei angin  
ṭawngṭaina hi chhânin  
awm lo mah se, kan beisei  
loh hunah kan beisei loh  
dânin min chhâng ṭhin  
bawk. Kan tâna ṭha tûr  
keini aia Lalpa hian a hriat  
miau avângin a remruat  
dân leh min chhan dâna  
lâwm thiam tûr erawh

Thawktute hian  
huaisen taka Pathian  
thiltihtheihna rinchhana  
kan thawh chhuah ngam  
chuan Lal Isua hi  
chawimawiin a awm a, chu  
chuan ringlote a híp a,  
ringtute a tichak bawk ṭhin.  
Tihdam rawngbâwna hi Lal  
Isua pawhin ṭangkai takin  
a hmang tih kan hria. Tûn  
thlengin Chanchin Ṭha  
puan darhna hmanraw  
pawimawh tak a ni. Kan rin  
Pathian hi Engkimtithei a  
nih avângin chak lo tê pawh  
ni ila, amah kan rinchhan  
tlat chuan Lalpan a ropuina  
puan chhuah nân min  
hmang thei a ni tih i hre  
thar leh ang u.

### CHANCHIN ṬHA HRIL NÂN - SIKUL

Rev. Lalthuanmawian, “Keni Kohran t n chuan Skul hi Di-  
rect Evangelism a ni” a tih ang hian Synod Mission Board in sikul  
kan neihnaah chuan subject hrang kan zirt r b kah hmaichhanah  
Pathian thu kan hrilh a, Pathian fakna hla kan cakpui a, Pathian thu  
ch ng kan zirt r a, Chanchin ha beihpui thl k hapta te kan  
hmanpui a, an hmaah ngei kan \awng\aisak \hin. Thawktuten  
\hahnemngei taka thusawi leh an nuna zilai 16500 v lzet hn nah  
ni tin Lal Isua chanchin an thlen hian mi tem tak Lal Isua hn n an  
hruai thleng tawh a ni Lalpa chu fakn awm rawh se.

H Vanlabhuanga

Supervisor of Schools, Synod Mission Board

**AIZAWL 'W' II AREA MEET VAWI-3 NA  
TLUANG TAKA HMAN ZAWH A NI TA**

*H. Rotluanga, Evangelist  
Zotlang Kohhran, Aizawl*

Ramthar chanchinbuah hian Masih Sangati Meet rawngbàwlna leh a chetvelna report hi chhiar tùr a tam lovin ka hria a, kimchang lo hle mah se inthlahrung tak chungin tlem azáwng lo tàr lang ila.

Ni 13-14 May, 2017 khán Aizawl 'W' II Area Meet vawi 3-na chu Chawnpui Pastor Bial, Zotlang Kohhranah hman a ni a. Thupui chu 'Pathian Hmangaihna' (Joh 3:16) a ni. Aizawl 'W' II Area Pastor R.K. Lalawmpuian nung takin ùm hnih a sawi a; kan chhehvêla hnam dang (*ringlote*) Pathian hmangaihna nêna ùhahnem ngai lehzuala beih a ùl tak zet thu a sawi te chu fuihna nasa tak niin, mipuiten kan ngaithla kham lo hle mai.

Inrinni zànah hian Upa Dr.H. Lallenmawian India ram Kristian Statistics dinhmun leh India ram Politics boruak thlirin harsatna pawh hmachhawn huama tih tak zeta ùhahnem ngai lehzuala

rawngbàwl a ùl tawhzia a sawi te chu kohhrante tán chona nasa tak a va ni êm! Chawnpui Bialtu Pastor-in, "*Masihi Sangati rawngbàwl-na hi hmun dangah nasa takin kan lo bei ve ùin emaw ka tih chu, helai rawngbàwlna han hmuh chuan a lo nasa tâwk lo hle mai,*" tia, fakna leh chawimawina a sawi chhuahte chu kohhran tán phurna thar leh lâwm chung a Lalpa rawngbàwl mai tùr kan nihzia a tàr lang a, a va ropui êm!

Kohhranin hnam dang in luah neitute hnêna ngenna a siam bawh zuina leh kohhran hrang hrangte ùhahnem ngaihna azárah ringlo 104 lai mai Pathian thu ngaithla tùrin hruai khawm an ni a. Pathianni



nilengin Gospel Team leh Evangelist ten hmun 14-a thenin Counselling Class lâk a ni a. Pathian hnathawh a lo lang a; mi 11 laiin Lal Isua ringin Baptisma an chang a, a va ropui êm! Halleluiah, Lalpan a hmu leh ta! Kan va lâwm êm!

He Meet-ah hian Area leh Fellowship hrang hrangte bâkah zai tûra sàwm bik - Aizawl 'W' I Area Standing Choir leh Chawnpui Pastor Bial zaipawl ten hla vawi 17 an rem a ni. Zaipawlten mipui thinlung hneh leh khawih thei tûra an hla chei mawi, thiam taka an sa te, nung taka zai thei tûrin ÷awng-÷aina nèn nasa takin an ÷ang a ni tih han hmuhin Lalpa a ropui zual a, Chawnpui Pastor Bial zaipawlten Mizo hnam puan sina hnam dang hla mawi tak leh thiam taka an rem te chu a ropui danglam hle

a ni. A tawp zàna thlengtu Kohhran zaipawlin hnam dang unaute hriatthiam zàwng tûra Pathian faka an zai te chuan rilru a va hneh êm!

Chanvo hrang hrang changtu KṚP, Kohhran hmeichhia, Pavalai pawl leh refreshment Committee ten an mawhpurhna phur tak leh hneh takin an thawk a. Hêng zawng zawngah hian Kohhran a inhawng a, a inbuatsaih nasa tih a lang a, Masihi Sangati hming pawhin lâwmthu kan sawi mawlh mawlh a ni.

Pathian khawngaihna azàrah Masihi Sangati rawngbàwlina hi Pathianin mal a sawm a, hma a sawn mék zêl a ni. Kan rama hnam dang unaute zingah Lal Isua ringa, a hnung zuitu an pung zêl a, Lalpa ram a zau zêl hi kan lawmna ber a ni.

*"I mi Israelite ni lo hnam dang mi, i hming av nga ram hla tak ata lo kalte chungch ng thu pawh hi; (i hming ropui tak te, i kut chak tak te, i ban i phar thute hi an la hre hlawm dawn si;) ch ngte chuan he mi in lam hawia an rawn \awng \ai hunin, nangin i awmna v na \angin lo ngaithla la, hnam dang mi chuan a d lang ang che chu lo tih sak ang che" (1 Lalte 8:41-43).*

## JOLAY HMUNAH LALPA NÈN

*Pastor R.C. Lalchhuanthanga  
i/c Tuidu Pastor Bial, Tripura*

Ni 2 July, 2017 khán kan bial chhûnga kohhran pakhat, Jolay tlawhin tûkthuan ei khamah keimahin ka thawk chhuak a. He kohhran hi Molsom hnam awmna, Tuidu aţanga Km. 16 vèla hla a ni a. Motor-a kal theih chin bâkah ke-in Km. 1 dâwn kal leh a ngai a, lui dai kai a ngai bawk a ni. He kohhran hi kum 2012 January thlaa ding ţan, Mizo hnahthlâk Molsom hlang awmna, kristian eng emaw zât an awm bâkah kristian la ni lo tlém azáwng awmna a ni.

**A kalkawng:** Tûnlai ruahsûr avàngin lei tla zeuh zeuh a lo awm ve a; ni danga ka kalna kawng ber, an khaw thlen dâwn tawha leihlawn chu a lo chim chhe vek mai a. Ka tlan lût laklawh tawh bawk si a, kawng chêp tak mai *feet* khat lek leka tawlin ka inher thei ta hrâm a. Tichuan, *bazar* lamah kualin khaw chhûng kawmkâr chêp takah ka tlan lût thei ta a.

Motor dahna aţangin ke-in ka kal leh a, thui vak lovah lui dai kai a ngai ta. A lo lian pûng mai a, tui a khauh êm avàngin dai kaina tûr ka hre mai lo. A tâwpah

chuan a hnár lamah ka dai chhin a; mahse, ka chapal khing a la ta daih mai a, han man hmanna rual a ni si lo. Kan um zui leh a, ka man leh hmian a len thla zêl, han um zui zêl dâwnin a vaukam a lo nâl phian bawk si a. A tâwpah vânehthlâk takin thing ţangah a tang ta hlauh a, ka la thei ta. Nu pakhat rawn kal ve a awm bawk a, ani dai kainaah chuan ka kal ve ta a. Kekawr erawh a huh thui duh ngei mai. Huh hnuang chungin Biak In chhûng chu ka lût a, a nuam dangdai khawp mai.

**Biak In chhûng lam:**  
Vânehthlâk takin bap-

tisma chang tùr mi 10 lai mai an lo awm a. Hêng zinga mi pali hi kristian la ni lo an ni bawk a, a làwmawm ngei mai. Baptisma chang tùr an han ding tlar a; nausen thla li mi kan han chantir tùr kha a pain, *“Ani kha chu a la chang thei lo, a ute pahnih chauhvìn chang rawh se,”* a rawn ti a. *“Engati nge?”* tia ka zawh chuan, *“Hmìng a la nei lo,”* a rawn ti a. Mahse, a ngai ngam lo nge ni, *“Lalringliana’ ni rawh se,”* tiin a hmìng a sa nghal hmiah mai a. Inkhâwmho pawh an nui ham ham a.

Ṭawngṭaisakna kan han hmang leh dâwn a, nu pakhatin a fa baptisma chang thar kha pâwnah a lo va chhuahpui daih mai bawk si, kan han inko lût leh rih a, a hlimawm phian bawk. Mahse, Pathianin hna a thawk a, ringthar min pe a, inkhâwm kan ṭha viau bawk a, kan hlâwk tláng hle. Kohhranho ṭawngṭaina hian ngawi rengin mite thinlungah nasa takin hna a lo thawk ṭhin a ni tih a lang chiang ṭhin.

**Inkhâwm ban hnu lam:** Kohhran mite ṭhatna hi rin phâk bâk a lo ṭhin. Kan Evangelist, Pu Lalnunmawia inah mímiban chhum tui tak mai an lo chhawp ṭeuh mai a, ka va han tlai tak êm! Ka eina nâwi arpui pathumin an han inchuh laih laih te chu hmuh a nuamin nun a hlim ru veng veng thei a ni. Chu mai ni lovin kohhran miten an thlai thar eng emaw zât an rawn keng khâwm a, khai ngial tham hawn tùr ka nei ta ringawt mai. Mite ka làwm zawh lohzia ka inhmu chiang ngei e. An theih tâwpa kei ve mai min duhsak hi phu lo ka inti a, Lalpa ṭhatzia hi a ropuiin rulh sen a ni ngai dâwn lo a nih hi. Kohhran ṭiak tìr tēa Pathian hnathawh hmuh tùr awm ṭhin hi a tak bîk ṭhin mang e.

Jolay aṭanga ka haw lam Ompinagar Kohhranah an Biak In hmun tùr chungcháng kan sawi ho leh a. Anni hi Debbarma hnam hlang awmna an ni thung a. Kum 2013 aṭang khân an Kohhran hian

ṭawngṭai thupuiah neiin Biak In hmun tūr Pathian hnēnah an lo dil ngat ngat tawh a. Sorkar hmun pawimawh awmna khua a nih vângin hmunhma a to êm êm mai baw k si. Kohhranin an theih ang angin sum an thaw k chhuak baw k a. Heng pawisa tlingkhâwm aṭang hian ram leina tūr in hmun pakhat an lo en tawh a. Sorkar-ah ram tih fel a ngaih avângin kumin kum tir aṭang khân an lo buai zak zak tawh a ni.

Ram leina pawisa kan han inpe fel, a ram teh fel tūra kan kal chu an thenawmten Biak In sak nân an lo phal awzáwng lo mai a. Ram tehtute nèn pawh an inhnial viau tak nâ a, beidawng ru angreng takin hmun dangzawn mai a ṭhat zâwk min rinpui avângin kan inthiarfihlim leh ta a.

Chutianga beiseina bo titiha an awm lai chuan beisei phâk loh khawpa thu lâwmawm kan dawng ta hlauh mai. Lei kan tum aia hmun laili zâwk,

kawng kam maiah kan Kraws Sipai nu (mother)-in a rama Biak In sa tūr in min pe ringawt mai a. A tirah Kohhran mi thenkhat pheih chuan an ringhlel deuh nâ a, amahin, “In duh chen chen in awm ang. Kum 30 pawh, kum 50 pawh ni se, ka tu leh faten harsatna an siam lo vang,” a ti mauh mai si a, a va lâwmawm duh êm!

Hemi chungchâng hi lehkhâa zia k tūr in Ompinagar Kohhran Committee te leh anmahni nèn kan sawi ho ta a. A tâwpa tâwpah chuan kum nga chhûng bang lova an lo ṭawngṭaina chu Lalpan a chhansak ta. Pawisa tlém azáwng tal pêk kan tum ngial pawhin, “*Pathian tán ram hralh ka duh lo, induh angin sa mai rawh u,*” a ti ta ringawt mai a ni. Amah hi Kristian a la ni lo lehngal!

‘*Pathian hnathawh hi a makin rin phâk bâk a lo va ni thei êm!*’ kan ti mawlh mawlh mai a ni. ‘*Lalpa kan lawm e,*’ tih mai loh zawng

sawi tûr kan nei lo. Beidawng lova amah nghâktute mamawh a hria a, Zoram lam Kohhranhovin bâng lova an lo dilsak ðhin hian awmzia a neiin ðawngtâina chhan a nihna tûr hmun takah hmuh a ni leh ðhin.

Thawh hlâwk lo ber ni ðhin mah ila, Lalpa tâna kan la thawk ve thei hi a lâwmawm ðhin. Krista tâna lu chhum ban chhum huama thawkte ka ngaih-tuah châng hian, ‘An hnung hi ka va han zui zo lo tak êm!’ ka ti lo thei lo.



### **“LALPA, INDIA RAM MIN PE RAWH”**

Scotland rama Protestant Movement hun laia rawngb wltu pakhat, John Knox (1513-1572) a \awng\aina chu, “*Give me Scotland or I will die*” (*Scotland ram mi pe rawh; chuti a nih loh chuan, ka thi ang*) tih a ni Chutih laia Scotland ram Lalna Mary (1542-1587), Roman Catholic ruh tak mai chu, “*Eng nge i hlauh ber?*” tûn an z wt a. Ani chuan, “*Europe ram sipai zawng zawng chakna aïm mi pakhat, John Knox a \awng\aina hi ka hlau ber,*” a ti

RSS ten ‘*Kum 2021 Chhjarpuiah chuan India rama ch ngte hi Hindu vek kan ni tawh ang,*’ tia beihpui an thl k laim keimin, ‘*India, Krista lalna ram at n’ tûn kan bei ve m k thung a Hei hi chona lian tak a ni; kan chak a ngai ‘Lalpa, India ram hi min pe rawh,’ tia Kohhranhovho theih t w p tak meuhva kan \awng\aina hun hle mai*

“*Mi tichaktuah chuan engkim ka ti thei a ni*” (Phil 4:13).

*K. Ronghaka, Mission Promoter  
Synod Office, Aizawl*

## KOHRAN INCHHIARNA (Statistics)

*Lalramtluanga, Evangelist  
Khumulwng, Tripura.*

*'Kan thupui chu Ramthar chanchinbu a chhuah atán chuan a va inhmeah lo êm!'* kan ti mai thei e. Mahse, kan ramthar rawngbàwlinaah hian sawi ÷ul takte zingá mi niin ka hre ve tlat si a; ngun takin i chhùt tlang teh ang u.

*"Aigupta ram ata an lo chhuah kum hnih kum, thla hnihna, ni khat niin Sinai thlalèrah inbiakna puan inah LALPAN Mosia a bia a, 'Israela thlahte pung khâwm zawng zawnge chu, a chî chîin, a chhúngkua kuain, an hming indawt dàn ang zêlin mipa zawng zawng chhiar vek rawh,'...LALPAN Mosia thu a pêk angin Sinai thlalèrah chuan a chhiar ta a"* (Num 1:1-2,19). Mosian LALPAN thupêk a hmuh angin mipui an ko khâwm vek a, a chî chîin, a chhúngkua kuain, an hming indawt dàn ang zêlin an chhiar a; an chhiar uluk hle mai.

Bible-ah hian inchhiarna thu hi kan hmu zauh zauh. Lal Davida hun lai pawh khán kan hmu a, Lal Isua pian dawn pawh khán

inchhiar tùrin Josefa te nupa pawh kha Judai rama Bethlehem khuaa an kal thu kan hmu. Khatih lai hun kha Rom Sorkar lai a nih hmèl a; eng pawh ni se, inchhiar hunah dàn angin an inchhiar ziah a nih hmèl hle a ni.

Hman lai ațanga hnam tintena an lo ngaih pawimawh 'inchhiarna' hi keini, Presbyterian Kohhran pawh hian kan ngai pawimawh hle a ni. Kum tin mai hian kan inchhiar ÷hin a, a bengvârthlák ÷hin hle. Keini chuan ringthar (Juda saphun) pakhat siam tùrin tuifinriat kan kal hual ÷hin si a; chuvàngin, kan Kohhran inchhiarna chung-cháng hi sawi i han tum teh ang. Chhiartute, ramthar lam mitthla chungá chhiar tùrin ka sáwm duh bawkw che u a ni.

India ram leh khawvêl hmun zau zâwkah Mizoram Presbyterian Kohhran chuan Missionary-te kan intîr chhuak a, ÷awngt'ai leh thilpêkin kan um zui a. Field ðhenkhatah chuan *Church Court* hawnsakin - Bial (Pastorate) te, Joint Pastorate te, Presbytery te, Synod te hial kan hawng a; hawn leh zêl tûr hmachhawp te pawh kan la nei a. Kan Kohhranin ramthima rawngbâwl na kan neih tirh (kan vei) aţanga vawiin thlenga kan tha leh zung, sum leh pai kan sen ral zawng zawngte hi han chhût chhuak ta ila, tih tham fé chu kan séng tawh àwm asin.

“CHUMI KHUAA MI NI TÛRIN KEI ZAWNGIN TANGKA TAM TAK KA SÊNG ASIN” (Tirh 22:28) tih thu aţang hian tûnlai kan kohhran inchhiarnaah zir tûr nei tlatin ka inhria a. Tualchhûng Kohhranah dik tak leh fel fai takin kan inchhiar ang a; chutah Bialah, Presbytery-ah leh Synod-ah te. Chutiang zêlin, a chung lehzêlah pawh a dik chho zêl dawn a ni.

‘*Hetiang thu te chu a va ho ve aw,*’ emaw ‘*Kan tih dânphung alâwm!*’ emaw ti mai teh suh. A bîkin, Ramthara *Church Court* kan neihnaah hian inbih-chian leh zual a ngai. Kohhran miten tha leh zung, sum leh pai leh ÷awngt'aina tam tak an séng a. Mi tam takin an ðhat lai hun vui liamin, Krista tán NUN hial chánin, mahni lam inngaihsak thei lo khawpin an thawk a. ðhalaiten an bialnu te, an bialpa te an kalsan dawr dawr bawk a. Tichuan, RINGTHAR kan han nei ve ta a, kan lâwm êm êm a. Zoram lama kan Kohhran nu leh pate hnênah lâwmthu min sawipui tûrin kan ringthar neih zât nèn lam bianga mittui luang zawih zawih chungin kan han hrilh a, kan Kohhran nu leh pate lah an lo lâwm êm êm bawk a.

Theihtâwp chhuahin ringtharte kan enkawl a. Hun a lo kal chho ve zêl a, kan ringtharte pawh kan sawi tâk ang khân *Kohhran Puitling* rawn niin, ‘ringtharte’ tih pawh duh tawh lovin, ‘Kohhranhote’ tih an lo duh zâwk ta hial mai, a va ropui êm! Chutih

ruala ka sawi tum tak chu hei hi a ni – **‘Kohhran inchhiarnaah hian a chhiartuten taihmâk i chhuah leh zual ang u’** tih hi a ni.

Mi, sakhaw nghet tak nei kha, *‘Lal Isua hi lo ring ve zâwk ta che,’* tia thiam leh thiam lova kan hrilh te khân, Pathian Thlarau Thianghlim hnathawh azârah Lal Isua chu an lo ring ve ta a. An sakhua an paih ðhak a, khawtlang ensan leh chhúngte tuithlâr hlawhin, Lal Isua an lo zui ve ta a. Hun lo kal zêlah chauh chángte a lo awm a, inkhâwmte an lo thlahdah ta a. Rinnaah an lo hnungtawlh a, Kristian ang pawhin an awm tawh lo va.

Chutiang hunah chuan an chauvin an khawhar ve hle ðhin. Chutih laiin, Kohhran lam lahin Kohhran aţangin kan lo bantîrin, Kohhran inchhiarnaah te kan telh ta lo mai ðhin hi a pawî ngawih ngawih a ni. Khâng mite khân, *‘Kohhranah hian kan tel tawh lo mai ang, kan bâng e. Min chhiar tawh*

*suh u,’* pawh ti se, *‘E, ni lo ve. Tûnah rinna kawngah chak lovin, i inkhâwm lo a ni mai a; LALPAN a pui che ang a, Kohhran mi ðha tak i la ni dawn alâwm!’* kan ti zâwk tûr a ni dawn lo’ m ni?

Chuti lova, Kohhran inchhiarna lamah mahni duh thu thua bantîr kan awm ðhin nia lang hi a fel lo deuh niin a lang. Krista thisenin a leite an nih hriain, hun harsaah pawh Krista tâna lo ding tawh ðhinte an nih hriain, bantîr lova lâk luh dân kawng zawn zêl hi a finthlâk zâwk àwm asin. Kristian la ni lote beia, Kristian-a siam tluk hian Kristian ni tawh sa – chak te, chak lo te, fel te leh fel lo te hûi khâwm zâwnga Kohhran tîhpun lamah hian rilru séng ila, taihmâk i chhuah sauh sauh ang u.

Mosian LALPA thupêk a hmuh angin a mite uluk tak maia a chhiar chhuak dap ang khân, kan kohhranin thupui hlapuia kan lo kalpui ðhin KOHHRAN INCHHIARNA (STATISTICS) hi Kohhranhote hian i ngai pawimawh zêl ang u.





## RAMTHAR FEH

### 1.

1. **Field hming** : Barak Area
2. **Khua** : Noxatilla
3. **Tlawh hun chhúng**: Ni 27. 02. 2017-03. 03. 2017
4. **Tlawh tu** : Mission Vengthlang Kohhran
5. **Kal zât** : Mipa – 18
6. **Tlawh chhan** : Hnathawh
7. **Hnathawh** : Lei laih leh pindan bang siam
8. **Senso zât** : ₹ 68,553/-
9. **Làwmawm lam** : Thawktute inpêkna te, inlungualna te leh thahnem ngaihna te kan hmuhin a làwmawm hle.
10. **Report tûl dang**: Noxatilla-ah hian Mission School kum 2013 ațanga din a ni a, phaizawla awm a nih avângin a hmunhma chei tûr an la ngah hle.

*Upa L. Lalremruata, Ramthar Ziaktu*

### 2.

1. **Field hming** : Tripura West Mission Field
2. **Khua** : South Maharaniapur
3. **Tlawh hun chhúng**: Ni 6 - 11 March, 2017
4. **Tlawhtu** : Sesawng Kohhran Pavalai Páwl
5. **Kal zât** : 30
6. **Tlawh chhan** : Hnathawh
7. **Hnathawh** : Biak In ( 34 x 14 ft, 7 x 9 ft ) sak
8. **Senso zât** : ₹ 46940
9. **Làwmawm lam**: Ni 06.03.2017(Thawhtanni) zing dár 7:00-ah Pastor Quarters kawtah Upa T. Lalrindikan Pathian hnênah țawngțaiin min thlah a, ruahsúr hnuaiah Pick Up pahnih hmangin kan chhuak a. Tluang taka kalin tlai dár 6:00-ah Kanhmun kan thleng a. Naogang-a kan kohhran mi Pu Lalrinfela Sailo (Missionary)-te chhúngkua tlawh paha riak nghal tûrin kan kal a. Kan beisei phâk lohvin Naogang Bialtu Pastor H. Lalmuankima hovin Missionary-ten min lo hmuak a, Pastor-in làwmthu sawina leh kan kal lehzelna atân Pathian hnênah țawngțaina a hmang a, kan làwm tak zet a ni. Thawktute in hrang hrangah zanriah kan ei a, zânah erawh chuan hian Quarters awl pakhatatah kan riak khâwm a. A tûk zing dár 5:22-ah Noagang chhuahsanin dár 9:09

a.m.-ah kan Work Camp-na hmun tûr Maharaniapur chu tluang takin kan thleng a. A hmun kan han thleng chu a thenin chaw an ei laiin, a thenin Biak In ding lai thiah hna an lo tan nghal a. Kan Work Camp hna bul tan hi Bialtu Pastor Jeho M.S. Dawnglian an nilenga min hovin min thawhpui a, a chungah kan lâwm hle a ni. Ni 9 (Ningani) tlai dâr 4:30-ah kan zo fel thei a ni. He Biak In a chung leh a bang rangva, a skirting chin brick rem, in pangngai tak NI THUM chhúng leka kan han sa zo mai thei kha Pathian awmpuina leh hruaina kan chang tak zet a ni.

March 9 (Ningani) zân hian Bialtu Pastor hovin Biak In tharah Inkhâwmna hlimawm tak kan nei a, tawng inhre tawn miah lote Lalpa faka kan han zai ho kha a va ropui êm! He inkhâwmah hian Upa C. Zaikiman thuchah a sawi a, Pavalaiten zaipâwl neiin *'Inkhâwmpui tiak tawh ngai lo, Lalpa min pe ang che'* tiin inkhâwmpui tiak tawh ngai lohna hmuna intawh leh ngei beiseiin kan in mangthâ ta a ni.

**10. Report tûl dangte:** Maharaniapur khuaah hian kan Kohhran In 4 vêl awmin, ringtu mi 30 vêl an awm. Thawktu chhúngkaw pakhat awmin, an Kohhran hi Fellowship mai an la ni a. An Kohhran hian 2018 hian Bial Kohhran Hmeichhe Inkhâwmpui an thleng dawn a; an Biak Inah hian thutthleng an nei mumal lo va, an mamawh hle a ni.

Ni 10 (Zirtawpni) zing dâr 7:00-ah Maharaniapur chhuahsanin tlai dâr 4:15-ah Bairabi Kohhran Pavalai Pâwlten duat taka min lo dawngsawngin, zanriah tuihnai tak min lo buatsaihsak a. Zân lamah Inkhâwm hona kan nei a, Upa C. Neihkungan Pathian thuchah sawiin kan Work Camp Report ngaihthlâk a ni baw. Zânah Kohhran Hall-ah riakin, zingah kan chhuak a. Ni 11 (Inrinni) chawhnu dâr 2:30 khân Sesawng chu eng mah harsatna tâwk lovin kan thleng leh ta a ni. Bairabi Kohhran Pavalai Pâwl leh Kohhrante min lo dawnsawnaah lâwmthu kan sawi e.

*C. Lalrinawma, Pavalai Pâwl Ziaktu*

### 3.

**1. Field hming**

: Barak Area

**2. Khua**

: Zaité Pastor Bial

- 3. Tlawh hun chhúng:** Ni 9 - 12 March, 2017  
**4. Tlawhtu** : Kawrthah Kohhran  
**5. Kal zât** : Mipa – 18; Hmeichhia - 3  
**6. Tlawh chhan** : Hnathawh  
**7. Hnathawh** : Biak In hmun laih leh SS ceiling siam  
**8. Senso zât** : ₹ 31,780/-  
**9. Làwmawm lam:** Hetiang hun hmang thei tùra min hruaitu Pathian chungah kan lâwm a. Zaité Pastor Bial chhúnga thawktu, Pastor leh Kohhranhote min lo dawnawnaah leh buaipuina zawng zawngah kan lâwm hle; an inpêkna a ropui kan ti.

**10. Làwmawm lo lam:** Zaité Bial chhúnga Kohhran pangaa Sunday School khai khâwm leh Sermon hun min pèk pawh khuain min bumro avângin kan tihlawhtling vek thei ta lo.

**11. Report tûl dangte:** Ni 10.03.2017 (Zirtawpni)-ah Ronpur khaw thar Biak In hmun laih hna kan thawk a. Tlai lamah Cheragi Kohhran tlawhin kan kal a, Biak Inah tawngtâi rualna te kan hmang a ni. Ni 11.03.2017 (Inrinni)-ah Zaité Kohhran Sunday School Hall (11x36ft) Ceiling chu dâpin kan siam a; kan zawh hman loh avângin Thawhtanni chawhma lamah kan chhonzawm a, kan zo thei ta a ni. Zaité Pastor Bial chhúnga a tûl tûla hman tùrin ₹10,000.00 kan hlan thei a, kan lâwm hle.

*Lalrinmawia Pachuau, Ramthar Ziaktu*

- 4.**  
**1. Field hming** : Home Mission South  
**2. Khua** : Zawlpui Synod Mission Compound  
**3. Tlawh hun chhúng:** Ni 20-23 March 2017  
**4. Tlawh tu** : Ramhlun Vengchung Kohhran  
**5. Kal zât** : Mipa – 12  
**6. Tlawh chhan** : Hnathawh  
**7. Hnathawh** : School Office chung Rangva chih  
**8. Senso zât** : ₹ 55,141/-  
**9. Làwmawm lam:** Pathian hruaina leh kohhranhote tawngtâina a zârah tluang takin hun rei lo têah hna kan thawk zo thei a, kan lâwm hle.

**10. Report òul dang:** Zawlpuihian Baptist nena inelna a nasa hle a. Kan Mission School leh compound-te hi tûn aia òha leh changtlung zâwka thuam ni thei se a duhawm hle. Thawktute thawh hona a òha hle.

*P. C Lalpawmia, Ramthar Ziaktu*

**5.**

- 1. Field hming** : Kârbi Anglong
- 2. Khua** : Silonijan
- 3. Tlawh hun chhúng:** Ni 30.03.2017- 04.04.2017
- 4. Tlawh tu** : Aibawk Kohhran
- 5. Kal zât** : Mipa - 15; Hmeichhia - 11
- 6. Tlawh chhan** : Field tlawh
- 7. Senso zât** : ₹ 99,980/-

**8. Làwmawm lam:** Ni 30. 3. 2017 zing dâr 9:20-ah Aibawk aţangin kan chhuak a, zân dâr 6:30-ah Silchar kan thleng a. Silchar Mission Compound-a thawktu ten làwm takin min lo mikhual a; zânah riakin, a tûk zing dâr 4:30-ah kan chhuak leh a. Kalkawngah Traffic Jam avângin zân dâr 12:30-ah Hamren kan thleng thei chauh va. Hetah hian riak lehin, Bialtu Pastor leh thawktuten min lo buaipui a, an chungah kan làwm tak zet a ni. Silonijan chu ni 01.04.2017 Inrinni zân dâr 6:00-ah kan thleng thei ta chauh a ni. Thawktuten zanriah min lo buatsaihsakin thlen inte min lo siamsak vek a, Present òha tak te min lo pe a, an chungah kan làwm êm êm a ni. Chaw ei kham hmasa apiang Biak Inah lût nghalin kan inkhâwm hman hrâm a ni.

**9. Report òul dang:** Pathianniah chuan insem darhin Bial chhúng Kohhran hrang hrangah Inkhâwmna kan neihpui a. Kan Missionary-te inpêk dân leh rawngbâwl dân mit ngeia han hmuha han hriat chu a ropui kan ti hle. Sikula an zirtîr zawhin an in lamah a òul angin an um zui nghal a; ei rawng pawh inbâwl mumal hman lovin, a châng pheih chuan chhun zân zawmin an thawk char char mai òthin a ni tih te han hriat chuan mahni insit a na duh hle. Ni 3.04.2017 zing dâr 5:30-ah Silonijan aţanga lo haw-in kawng lakah riak tawh lovin dam takin ni 4.04.2017 zing dâr 11:30-ah In kan thleng leh ta a ni. LALPAN òhahnem ngai taka a

rawngbáwltu Missionary-te tisa leh thlarauvah malsáwmnain vûr zêl rawh se.

*R. Lalduhsaka, Ramthar Ziaktu*

**5.**

- 1. Field hming** : Home Mission South
- 2. Khua** : Sabualtlang
- 3. Tlawh hun chhúng:** Ni 4 – 13 April, 2017
- 4. Tlawhtu** : Ramhlun North Kohhran
- 5. Kal zât** : Mipa – 8
- 6. Tlawhchhan** : Hnathawh
- 7. Hnathawh** : Sikul (15x40 ft) sak
- 8. Senso zât** : Rs 1,42,310/-
- 9. Làwmawm lam** : Ni 4.04.2017 (Thawhlejni) zing dár 7:30-ah Upa Tinkhândalan Pathian hnêna ÷awngtâiin min thlah a. Ruah leh thli thawk mup mup mai kârah Motor pahnihin kan chhuak a, khaw chhia indantîr tum lova chhuak kan nih avângin Kohhranhoten nasa takin min lo ÷awngtâipui a. Harsatna tâwk lovin tlai dár 5:00 vêlah dam takin Lawngtlai kan thleng. Lawngtlai-ah Pu Tumliana te chhúngkua-in hneh takin min lo thleng a, an chungah kan lâwm hle.

Ni 5 (Nilaini) zingah khua a rawn thawk leh mup mup mai a, hemi ni hian kawng chhia kan zawh dawn tih inhre chungin Pathian rinchhan tak meuhin kan tlan chhuak leh a; mak tak maiin Pathianin hna a thawk a, khaw ÷a min pe zui leh mai. Kohhranho ÷awngtâina chhâng ÷hin Pathian kan nei hi kan va lâwm êm! Kawng chhia leh kawng nâl tak tak pal tlangin kan hnathawhna tùr khua Sabualtlang khua chu tlai dár 5:00 vêlah Pathianin min hruai thleng a ni. Ni 6 (Ningani)-ah sikul sakna hmanrua kan nghâk khâwm a, a tûk zing a÷angin sikul sak hna kan ÷an. Sabualtlang Kohhranhote an rawn hnattlang ve bawk a, kan hlim dar dar ÷hin hle. Ni 11 (Thawhlejni) khân Pathian hruaina azârah kan hna chu kan zo thei ta. Hei bakah hian sikul ÷hutthleng leh dawhkante kan ruahmansak bawk.

Ni 12 (Nilaini) zing dár 7:00-ah Aizawl lam panin kan lo chhuak a. Lunglei khawpuiah Er. Lalchhuana leh Pi

Zorammuani-te nupain hneh takin min lo thleng a, an chungah kan lâwm tak zet a ni. Upa Lalthanliana Ramhlun North te, Govt. Complex Kohhran leh Lawngtlai Vengthar Kohhran ten school chung tûr rangva (*bundle hnih theuh*) an thawh a. Pu Ruata Zote te nupa, Ramhlun North ten sikul naupang *uniform* tûr an pe bawk a. Hêng Ramthar rawngbâwlnaa mi inphalte chungah hian kan lâwm hle.

**10. Report tûl dangte :** Sabualtlang khuaah hian ni 8.01.2016 khán Presbyterian Kohhran Branch Church a ding thar a, Tuithumhnar Pastor Bial khaw 10 zinga pakhat a ni a. Tûnah hian Presbyterian English School hawn thar a nih a, kan kohhran pawh In 42 lai an awm ve ta. Sikul hawn tharah hian zirlai 67 an awm mék a, sikul *building* thar an neih tâk avâng hian Kohhran member leh zirlai an pun chhoh ngei an inbeisei.

*K. Vanlalfaka, Ramthar Ziaktu*

**6.**

- 1. Field hming** : Home Mission North
- 2. Khua** : Marpara Ramthar Kohhran
- 3. Tlawh hun chhúng:** Ni 12-17 April, 2017
- 4. Tlawh tu** : Ramhlun Venglai Kohhran
- 5. Kal zât** : Mipa – 19; Hmeichhia - 6
- 6. Tlawh chhan** : Good Friday& Easter Sunday  
hmanpui paha hnathawh
- 7. Hnathawh** : S. S. Hall (48x9)
- 8. Senso zât** : ₹ 1,68,430 /-
- 9. Làwmawm lam:** Good Friday niin Group thumah inthenin Branch Church pathum – Begabekkyia, New Sachan leh Tiperasora te kan tlawh a. Tanpuina Rs 4,000/ - theuh kan pe a, kan hlim hle.

**10. Làwmawm lo lam:** A awm lo dáwn emaw kan ti a. Easter Sunday tlaiah Mission School hmeichhe naupang K.G. I admission zo fel hlim chu Mar luiah a tla hlum hlauh mai a, pawh kan ti hle.

**11. Report t̄ul dang:** Easter Sunday chawhma Inkhāwmah kan Group Leader Upa Laldingliana Sailo-in thu a sawi a; zàn Inkhāwmah Pu H. Thanchunga, kan Ramthar Committee Secretary-in thu a sawi ve thung. Ni hnih (Ningani leh Inrinni) hna kan thawk a; Missionary-ten min t̄awiāwm t̄ha êm êm a, kan hna pawh kan zo thei a ni. Pastor, Pro Pastor leh Headmaster te leh thawktu dang zawng zawng ten a bul aṅanga a t̄awp thlengin min thawhpui a, kan lâwm êm êm a ni. Hna thawk theia ni t̄ha leh hrisêlna t̄ha min petu Lalpa chu fakin awm rawh se.

*H. Thanchunga, Ramthar Ziaktu*

**7.**

- 1. Field hming** : Home Mission North
- 2. Khua** : Kolalian
- 3. Tlawh hun chhúng:** 13-17 April 2017
- 4. Tlawh tu** : Republic Veng Kohhran
- 5. Kal z̄at** : Mipa – 21; Hmeichhia - 7
- 6. Tlawh chhan** : Good Friday leh Easter Sunday  
hmanpui paha hnathawh
- 7. Hnathawh** : Kohhran School (Private) chhe laite  
thawm t̄hat leh Missionary Quarters  
Store Room siam
- 8. Senso z̄at** : ₹ 83,016 /-
- 9. Làwmawm lam:** Ni 13.04.2017 (Ningani) z̄ing d̄ar 6:40-ah Sumo 3 leh Scorpio 1 hmangin kan veng aṅangin kan chhuak a, Upa H. Zoramthangan t̄awngt̄aiin min thlah liam a ni. Tluang taka kalin Zamuangah, Zamuang North Kohhranin thingpui leh chhang tui tak min lo buatsaihsak a, kan lâwm hle. Thingpui te in zawhah kan kal z̄el a, t̄lai d̄ar 6:30-ah Kolalian kan thleng a. Kohhran hoten min lo dawngsawng a; zanriah min lo buatsaihsak chu kan kil ho va, kan hlim hle.

Good Friday leh Easter Sunday kan hman chhúng hian Kolalian Kohhranin thusawina hun zawng zawng Easter Sunday zàn tih loh chu tlawhtute min pe vek a ni.

Thusawituten t̄ha tak leh nung takin an sawi hlawm a, a làwmawm hle. Hlim takin hlim làmna nèn hun kan hmang a. Republic Veng Kohhran aṅanga kalte hian

Inkhâwmnaah ÷um thum lai Zaipáwl kan neih bâkah Trio leh Duet te kan nei thei a, a lâwmawm kan ti hle. Kohhran Inkhâwm leh lengkhâwm pawh Pathian Thlarau páwlna nèn hlim takin hun kan hmang a ni. Easter Sunday chawhnu Inkhâwm banah Group thumah insiamin Kohhran Committee te nèn Kohhran In zawng zawngah ÷awngñainain kan tlawh chhuak a, a hlimawmin Kohhran mite pawh an lâwm hle.

Ni 15.04.2017 (Inrinni)-ah Good Friday lâwmna ruai buatsaihin Vawk kan talh a; fatu mi 5 tih loh chuan Kohhran School bang thawm ÷hat ngai te thawm ÷hain leh Evangelist Quarters hnuaiah Store Room kan siam a. Tlaihah Good Friday Lâwmna ruai Kohhran mi 160 vèl laiin hlim takin kan kil ho va, a hlimawm tak zet a ni.

**10. Report ÷ûl dang:** Kolalian khua hi In 156 an ni a; In 75 chu ringtu niin ringlo In 81 an ni a. Kan Kohhran member zawng zawng chu 212 an ni. Kohhranhote thawh hona leh ÷an lâk dàn an fakawm hle mai. Kristian Hla bua kan hlate sa thiam tùrin kum khat chhúng Inrinni zân apiangin hla an zir ÷hin.

Kohhran an la pachhe hle a, intodelh tùrin ÷an an la nasa hle a. Kohhran In tinin huan nghet nei tùrin an inzirtír mèk a ni.

Zirna a ÷hat tâwk loh avàngin ziak leh chhiarah an hniam hle a, rawngbâwlna lamah pawh harsatna an tawhna lian tak a nih avàngin harsa tak chungin Kohhranin Private School a din tawp a ni. Ringlo fate pawh lùtin he sikul hi ringlote beihna ÷ha tak a ni a, zirlai nu leh pate khâwmin Pathian thu te hrilh ÷hin an ni.

Pathian Thlarau Thianghlim malsâwmna nèn Good Friday leh Easter Sunday hlim leh lâwm taka Kolalian Kohhranhote nèn kan hman hnuin ni 17.04.2017 (Thawhñanni) zíng dár 6:45-ah Aizawl lam panin kan chhuak leh ta a. Upa Zakhuma, Kolalian chuan ÷awngñaiin min thlah liam a, Pathian enkawlna leh hruaina dawngin tlai dár 6:30-ah Republic Veng kan thleng leh a ni.

*Lalduhsanga Royte, Ramthar Ziaktu*



## **PI P.C. BRILLY RONGPI (1959-2017) KAN CHÁN TAI!**

Pi P.C. Brilly hi Pu Khonsing Rongpi fanu niin ni 02.12.1959 khán a piang a. Pu P.C Nunhluna nèn ni 19.11.1979 khán inneiin, fa pahnih - Pi Hanry Lalrinhlui, Durtlang leh Rev. Albert Lalnunzama i/c Damak Pastor Bial (Nepal Mission Field) te an nei a ni.

Pi P.C Brilly hi Missionary-ah ni 13.3.1983 khán a lût a. Karbi ram chhúnga kan mission school eng emaw zatah bul tuntu, hma la hmasatu a ni a. Sarihajan (1983), Lamarang (1984), Lumtubin (1985-1989), Hamren (1990) leh Silonijan (1993-1996)-ah te Evangelist Teacher hna a thawk. Heng zínga school pathum: PMS Sarihajan, PMS Hamren leh PMS Silonijan-ah te Headmistress hna a thawk a ni.

Kum 1986-ah Missionary Training-in Aizawlah a chhuak a; kum 1991-ah DIET training-in Mizoramah a chhuak leh bawk. Kum 1992 khán Karbi Anglong Mission Office, Diphu-ah a thawk a. Amaherawhchu, Silonijan-ah zirtirtu indaih lohna avàngin 1993- 1996 chu zirtirtu hna a thawk leh a. Kum 1997-2014 chu Field Office-ah Literature Worker-in a awm a. Kum 2014 ațanga a thih ni thlengin Office Assistant-in a awm a ni.

Literature Worker hna a thawh chhúngin a țangkai êm êm. Karbi Anglong Mission hian literature lamah hma a la nasa hle a. Kum tin a lo berah SS Zirlai, Nilai Zan Thupui a buatsaih ziah a. A ziaak tûrin Missionary leh Pastor-te ruat țhin an ni a. Hêng lehkhabu zawng zawng tih theih deuh thaw hi a lehlin a ni a; ama ziah a awm bawk.

Sermon lehlin hi a *talent* a ni a, a let nasa hle. A ngaithlatute tána hriat nuam leh awlsam taka lehlin a thiam hle. A țhat lai hun khán țawng let tûrin hah leh nin a sawi ngai lo. A kalna apiangah mite ngaihsan leh ngainat pawh a hlawh hle țhin.

Pi Brilly hi rawngbâwlina kawngah mi țangkai leh thawhpui nuam tak a ni. Mi dangte pawh sawi leh mi

dangte tána thawhpui hrehawm nih a hlau em em ðhin. Mi inngaitlâwm tak leh inpe tak, eng hna pawh a kova tla chu hlen chhuah tum tlat mi a ni. Karbi Kohhran tán ðhahnem a ngai êm êm a; ‘Kohhran hi a ta alâwm’ tih khawpin ðhahnem a ngai a ni.

Pi Bri chanchin ropui tak tak zínga entawn tlák tak chu a pasal tána nupui ðha a nihna hi a ni. Karbi mi ni mah se, Mizo ðawng thiam tak a ni. Mizo ðawngin a ðawngðai ðhin a, a fateho pawh hi Mizo ðawng hlirin a be ðhin.

ðawngðai mi, chhúngkaw tána mi inpe zo tak a ni a, a pasal leh fate tán nasa takin a ðawngðai ðhin. A dam phawt chuan zíng ðawngðai inkhawm a ðhulh ngai lo va, mi dang an remchan loh pawhin mahniin a ti ðauh ðauh ðhin a ni.

Ni 21.06.13-03.07.13 khán a *stroke* avàngin Guwahati GNRC Hospital-ah enkawl a ni a, hemi kum vêk hian he damdawi inah hian ðum hnih dang an lût a ni. Dam ðha chho viauva ngaih a nih laiin ni 24.01.16 khán a rawn *stroke* nawn leh a, Guwahati GNRC-ah bawk enkawl a ni a. Thla khat hnuah chhuahtír a ni a; mahse, a thih ni thlengin a tho thei ta lo a ni. Kum 2016 September thla khán a lúng hnún (*heart valve*) thlákin zaipui a tâwk leh a. 2016 November-ah Mizoramah rawn chhovin Synod Hospital, Durtlangah leh a fanu te in lamah te enkawl a ni a. Hniam lam a pan zêl avàngin ni 01.06.17 khán Diphu-ah hruai thlák a ni a.

Karbi Anglong-a Chanchin ðha puan darhna atána a nun pum hlana, Missionary leh Kohhranho te tána entawn tûr leh sulhnu ropui tak tak hnutchhiahtu, Krista Pasalðha chuan ni 12.06.2017 zàn dár 7:00 khán Lalpa hnênah mín chawlhsan ta a ni. A tûk chawhnu dár 1:00-ah Rev. F. Pachhunga FS, KAMF chuan vuiin, ui takin thawktute leh Kohhranhoten an thlah liam ta a ni.

Synod Mission Board tán chàna nasa tak a ni. A kalsan tâk, Kohhranho leh a chhúngte Pathianin awmpuiin thlamuan rawh se.

### SMB RINGTHAR 2017

Field	May thleng	June	June thleng
Arunachal East	115	2	117
Arunachal North	166	22	188
Arunachal West	85	10	95
Assam	28		28
Barak	89	3	92
Delhi	27	9	36
Jharkhand	284	38	322
Karbi Anglong	97	16	113
Home Mission North	30		30
Home Mission South	115	45	160
Kolkata	293	71	364
Lucknow	88	68	156
Nepal	81	8	89
Odisha			0
Patna	74	14	88
Siliguri	35	25	60
Tripura	933	179	1112
Masihi Sangati	805		805
<b>TOTAL</b>	<b>3345</b>	<b>510</b>	<b>3855</b>



**AIZOWL WEST - 1 AREA MASIHI SANGATI  
Puipate leh Standing Choir 2016-2017 Member-te  
Tuikual Kohhran Biak In**

Postal Regn. No MZR/46/2015-2017

RNI Regn. No. 40889/88

**PI P.C. BRILLY RONGPI  
(1959-2017)**

KAMF lehkhahu chhuah  
zawng zawng tih theih deuh thaw  
hi a lehlin a ni.

Sermon lehlin hi a talent a  
ni a, a let nasa hle. A ngaithlatute  
tána hriat nuam leh awlsam taka  
lehlin a thiam hle. A that lai hun  
khán tawng let túrin hah leh nin a  
sawi ngai lo. A kalna apiangah  
mite ngaihsan leh ngainat pawh a  
hlawh hle thin.

Pi Brilly hi rawngbáwlina  
kawngah mi tawngkai leh thawhpui  
nuam tak a ni. Karbi Kohhran tán  
thahnem a ngai em em a;  
'Kohhran hi a ta aláwm' tih  
khawpin thahnem a ngai a ni.



To



Bru Gospel Team-ten Tumpangluiah mipui ko  
khâwmin Chanchin Tha an hril a. Chhun chawlhah  
mipui haw túr chelh nán an thiam ang angin an lám!  
Lalpa tán an va mawi dáwn em!

**HOME MISSION NORTH**

If not delivered please return to:  
The Manager  
Ramthar Chanchinbu  
Synod Office, Aizawl, Mizoram,  
India. Pin - 796001

**Published by Rev. K. Lalrinmawia and Printed at the Synod Press, Aizawl on  
behalf of Ramthar Association, Aizawl, Mizoram. Copies- 32,500**